

涉縣志

貞

卷之五

涉縣志卷之十

邑令大興黃澤重修

人物

忠孝節義天地正氣也涉雖丸邑山川所鍾賢哲
挺生其忠節凜然出處大節彪炳簡冊者亦既千
秋不泯矣然章縫布衣及巾幗之中有至性流行
扶植人倫者皆正氣之所磅礴也豈可使之湮沒
不傳耶

涉縣志

卷之十

人物

一

忠

宋

陳咸合漳村人紹興中進士爲利州路轉運判官
時蜀帥吳曦反自稱蜀公不受僞命自髡其髮
事平上嘉之擢爲寶謨閣待制

陳寅咸之子兩貢進士以父廕出知西和州北兵
入邊公誓堅守有郡統何進徙家他郡民無固
志公獨畱家口在城散貲財以結忠義北兵十

萬攻城以降卒爲先驅公草檄諭之自執旗鼓
激將士忠義民兵力戰晝夜數十合北兵退制
司方以公功徧告列郡已而北兵增數十萬圍
之公求援甚急久之制司方遣人赴援託以道
梗不至孤城力絕遂陷公妻子俱死之乃朝服
登戰樓望闕號泣曰臣始謀守此城池爲蜀藩
籬城之不存臣死分也臣不負國再拜伏劍自
盡賓客同死者二十八人一子後至亦死之事
聞贈朝議大夫賜錢三十緡立廟祀之加贈文
華閣待制謚襄節縣北關舊有忠節廟

賈達

周

狐突晉大夫懷公時突子毛及偃從重耳如秦公
執突曰子來則免對曰子之能仕父教之忠古
之制也今臣子名在重耳有年矣若又召之教
之貳也父教子貳何以事君遂死之

涉縣志

卷之十 人物

二

按廣輿志狐氏人物丘墓在山右太原非涉人
矣但涉有利應侯廟依舊志存之

馮亭秦攻韓上黨急時亭爲上黨守使人告趙曰
民不欲以上黨與秦願拜納於王趙王悅乃使
趙勝往受地以三萬之都封亭亭垂泣曰是吾
處三不義也爲主守地不能死而以與人不義
一也主納之秦不順主命不義二也賣主地而
食之不義三也遂辭封而入韓

涉縣志

卷之十

人物

三

漢

令狐茂卽壺關三老武帝捕反者太子兵敗上書
畧云皇太子承萬世之業親則宗子也江充迫
蹙太子造飾奸詐太子進不得見上退困於亂
臣寃結無告不忍忿忿之心起而殺充臣竊以
爲無私心書奏天子感悟

宋

崔國華字德夫乘雲里延福村人讀書善屬文克

盡孝弟宋時行三舍法崔由縣生入府學外舍未遂志改入武學外舍畱心武經練習弓馬果獲高薦升入太學十年攻苦不滅燈不解衣春試唱名第四入第賜承節郎宣和三年陞授婺州金華縣尉討方賊平餘黨進封武翼大夫

明

李徵洪武中進士知南鄭縣深達治體興利除弊風移俗易遷陝西道監察御史

涉縣志

卷之十 人物

四

姚福永樂中舉人興濟縣教諭少貧乏油隨月讀書帶經而鋤常講學以明體適用爲要門下登第者甚衆時稱爲道學先生

陳璘字玉明正統年間貢知井陘縣一廉如水有狼害民子公牒告城隍果得其狼抵罪給養其民又境有飛蝗公禱於天蝗越境去後朝覲入

京吏曹署曰天下清官第一勅命褒之

今祀鄉賢

王科字進卿正德中進士任藍田令毀淫祠修學

宮引水入城以利民用擢工科給事中上書罷
秦府工役及惜人才利民生諸事咸嘉納焉劾
武定侯郭勛總兵趙文等玩寇諸罪會執政右
勛遂落職世宗朝詔贈太常少卿祀鄉賢

李紹嘉靖閒任井陘縣知縣有善政崇祀名宦

李棟字尚隆紹子隆慶中進士令陽城時剔蠹興
利以卓異舉擢山東道御史廉得巨猾欲實重
典賄權璫求免終不飭法江陵父喪當奔台臣

涉縣志

卷之十 人物

五

議畱疏具不署名內軍操演禁中抗疏極諫擢
大理寺丞辨豁冤獄百五十餘人晉少卿獄稱
平允祀鄉賢

周晟字德明年十九舉於鄉景泰中進士初試政
刑部平反當大司寇意遷永平知府遣貧民婚
嫁判滯獄千人歷任江西布政所在有聲

董槃嘉靖年間貢知榆社縣剛直廉介遇黠寇犯
內地公急令鄉民入城清野待之躬冒矢石晝

夜督守遣壯士夜斫鹵營遂退去民賴以安

李秉謙嘉靖年間貢歷任代州知州謫遷鄖西縣令簡直廉介學問宏博休致十餘年當事者薦剡六次青衿從之講學者甚衆著作極多曾修縣志本府楊公爲之立祠俟舉鄉賢

楊其廉字計六崇禎中進士授長垣令進饑民疏忤當事謫楊州照磨歷陞兩淮鹽運副使告致後屢徵不出疏草見藝文

涉縣志

卷之十 人物

六

國朝

李新鼎號鉉吉順治年間副榜貢授臨江別駕幼以孝聞執親喪哀毀幾至髡髮居官廉明攝屬邑篆屢著惠政尤喜培植寒士率多登第者因他事左遷士民立去思碑有李清天之稱再補趙州倅積瘁終於官生平孝惠清介可以風世

孝

宋

陳岐陳嶷隨父守西和州元兵陷城母仰藥死二子及婦俱死母側

明

周道邑庠生母早卒事繼母以孝聞鄰里有不能婚葬者盡力捐助守道旌表其門

李仁紹父性至孝繼母生子恭仁悉以家產讓之奉養益篤每侍母病衣不解帶入府孝子祠

王覲事繼母以孝聞守道旌表

涉縣志

卷之十 人物

七

任廉同妻康氏事祖父母曲盡歡心祖父母病劇至爲嘗糞守道旌表

李灼監生父棟卒於京灼扶櫬歸葬廬墓三年院道旌表

楊如桂七歲喪母哀痛徬徨不離柩側父病侍寢衣不解帶廬墓三年朝夕焚香涕泣不御葷酒院道旌表

李良宦母患瘡宦以舌舐之而愈

李鵬歲貢生兩事繼母俱稱最孝分產半給義兄
遇歉歲以餘粟贍族人

王尚賢善事父母人稱克孝力學不倦惜其早卒

李如白俱廩生孝行純篤母病爭顰天願以身代

國朝

楊生寅庠生母卒哀痛過禮不離苦次廬墓三年

朝夕焚香哭泣不御葷酒邑令左詳請旌表

賈俊舉人善事繼母遇病輒涕泗日夕不解衣藥

涉縣志

卷之十 人物

八

必親嘗邑人俱稱爲孝

義

明

趙用偏店村人正統六年饑出米一千二百石賑

饑有司上其事 勅旌義民

李榮温村人正統六年輸米麥一千餘石賑饑賜

坊旌義

王金縣北關人萬歷八年饑出穀一千石賑饑賜

坊旌義

楊宗仁下庄村人助義修明倫堂割腴田代完逋賦建府君廟彌陀寺生平力田一錢不餘兩舉鄉耆不赴邑令劉旌之

李一正秉性純厚以孝義聞壽至八旬有八三舉鄉耆邑令李天柱旌之

尚坤南關人好善樂施其友王堂嘗寄金於其家時漳水漲發廬舍漂沒坤獨負其金避高樹上

水定歸原金於堂堂分半以謝卒不受有富商躍馬斃其幼孫絕無怨言惟歸天命而已各院道咸旌其門

竇文會克敦敬讓三世百口同居內外無間言有司旌義

楊敬先南岡村人掌刑掾有鄉人以年老鬪死其子夜持三十金賄囑冀招抵償不受誣者得脫有充戍應遣者族人苦於津解兼利其資夜共

謀殺之哀聲震動敬先不避鋒刃趨救之乃解
其他善行類如此可謂刀筆中無賢者乎

張珣赤岸村人廩生勤於學問一日得遺金於道
悉還其人

吳守義灘裡村人施棺濟貧舉鄉飲

呂應爵施棺濟貧捐資修路年九十舉鄉飲

李環温村人邑庠生天性孝友家累千金悉以讓
其兄若弟兄瑾早逝環撫其孤俱得成立邑令

涉縣志

卷之十

人物

十

聞其賢六舉鄉飲其後子孫貴盛人皆以爲爲
善之報云

李柵孝友敦睦賑饑解訟鄉鄰德之年八十累舉
鄉飲不赴邑令聞其賢造廬請見

李國治井店村人崇禎年貢值賊攻寨急度不能
免偕幼婦同自盡

李日新温村人庠生明末拒賊死難

遺逸

明

楊弼景泰年貢天資厚重恬淡無欲終身不仕

吳宗儒庠生謙和孝友善交同志化導鄉人嘉靖年間學道旌之

王仁民庠生品行高潔識養淵宏造就後學多登仕籍當貢而卒學道優獎之

馮時雨庠生事親孝撫幼弟友門墻桃李多人連舉行優三次學道旌之曰至德可師

涉縣志

卷之十 人物

十一

耆賓

國朝

楊際泰歲貢生年十三采芹誦讀至老不倦和厚端廉有磨石老人之號年七十公舉介賓

王鉉邑庠生家貧如洗事親克孝年七十舉鄉賓
王宋邑庠生端方謹飭無隙可議年七十舉鄉賓

李若杜庠生孝友交稱詩書迪後年八十舉鄉賓
李岱廩監生居家克孝素行端方足不履公庭年

逾七十舉介賓

江蜀溶歲貢生操行端莊親喪三年舉止一準於禮淹貫五經俱自出心神詮註年七十舉介賓馮愈歲貢生坊表交修品行純潔年七十舉介賓段紫紘歲貢生素行端方爲人謹厚年七十舉介賓

賓

李梅臺村人淳厚容忍媼睦宗黨惠濟遠人嘗夜見穿窬伏已屋上慰遣之次日密與之粟又見竊已柿者反避之迂道歸家恐竊者見而驚墜也年八十公舉鄉賓

劉守好南庄人天性淳厚年九十公舉鄉飲
江聚才張家庄人天性誠實素行和謹年九十公舉鄉飲

楊可成七原村人秉性忠厚睦族敦隣年七十公

舉鄉飲

康王安馬布村人和厚端謹年七十公舉鄉飲

李玉富連泉村人勤慎嫻睦年過七十公舉鄉飲

趙作霖偏店村人孝惠和厚年七十公舉鄉飲

趙高西達城人鄉隣稱孝天性忠厚年八十公舉

鄉飲

王業昌井店村人天性淳厚素行無過年七十公

舉鄉飲

江美河南店人和厚誠朴年七十公舉鄉飲

申鑑神頭村人誠實無過年七十公舉鄉飲

劉自富段曲村人孝友克敦年七十公舉鄉耆

師克美石門村人持已方正年六十公舉鄉耆

李玉周西戍村人齒德兼優年六十公舉鄉耆

楊之珍索堡村人人品端方年六十公舉鄉耆

傅帝臣更樂村人天性純篤年七十公舉鄉耆

楊名高神頭村人孝友淳厚年七十公舉鄉耆

壺德 孝 節烈

宋

杜氏西和守陳寅妻元兵陷城寅曰若速自爲計
杜曰安有生同王祿死不共王事者遂飲藥死
子岐嶷及婦俱死之

明

涉縣志

卷之十

人物

十四

賈氏王謙妻年二十失所矢志終節至八十而
卒

李氏王文妻十七喪夫終身守節無玷上司旌之
王氏生員張堂妻二十喪夫善事舅姑義方教子
至老無議

王氏成祿妻正統時人無考

李氏張思溫妻堂男婦早年喪夫誓節養姑分守
道旌獎

王女生員薛霖妻

任氏申通妻見州志守道旌獎

馮氏王範妻

李氏貢生張問政母自幼喪夫奉姑課子一準於

禮知縣旌表

康氏申雄妻二十四歲夫故躬紡織艱苦萬狀撫

孤入庠提學兩加旌獎

李氏王至明妻二十二歲夫故無子守節年八十

涉縣志

卷之十

人物

十五

知縣游獎其門

任氏張興詩妻年二十歲喪夫姑令其改嫁誓撫

數月孤守節備歷貧苦年七十卒知縣旌表其

門

趙氏生員李元妻年二十喪夫撫三歲孤誓不再

嫁知縣王旌其門

任氏魏宗漣妻二十四歲夫故撫兩歲孤成人知

縣羅表其門

王氏李體仁妻年二十夫沒遺腹生若輅躬紡織
以延師課子成立府道兩旌其門

李氏生員楊一鳳妻二十四歲夫逝貧困苦守撫
二歲孤子耀翀成名

李氏儒士趙崇善妻夫沒苦節教子英年入泮知
縣蔡旌其門

程氏夫王道立早卒誓不改節事始育子入共賢
之

趙氏夫郝自行早故生子甫三月撫孤終節

張氏廩生李躍鱗妻年二十三夫卒姑老子幼貧
窘無倚張奉養無缺課子成名縣尹扁其門曰
節孝可風及沒親爲文以祭之

張氏夫程自學早故青年守節貧而無子至老彌
篤知縣任旌之曰栢舟苦節

席氏故生任岳妻家貧或勸再醮席泣辭之因毀
容以示終節

趙氏王朝周妻少寡矢節撫孤

王氏生員李輝妻夫沒時方二十一歲堅志苦節

三十年如一日

武氏夫程光耀早故氏甫二十二歲家貧苦節撫

孤入泮縣令屢旌其門

楊氏國學生李均妻早卒氏年二十苦志事姑撫

子入泮邑令旌之曰栢楫熊丸

蕭氏馮甘露妻姑強之改嫁因自縊暨救免遂得

涉縣志

卷之十

人物

十七

終節撫子入庠

楊氏馮必啓妻年二十二一子尙在襁褓誓守節

撫之

武氏生員趙蓋臣妻年二十五守節教孤入泮

張氏生員李日新妻年二十四苦貧守節

馮氏王任臣妻年十九立志撫孤孤既天仍苦節

終守歷年八十邑令旌獎

趙氏温村民李登妻年二十二時賊陷圍抱幼子

投火死煨燼中猶見母子相抱狀

王氏鄭永祿妻賊至投崖死賊高其節具土掩之
副使楊表其門曰貞烈

張氏楊文采妻二十五歲賊至不受辱投崖死賊
具土掩之楊副使表曰貞烈爲雙烈文祭之

賈氏魏家灣人姑病思肉家貧且離市遠氏因割
股進姑姑食而甘之病遂愈道府聞其事給扁
給粟

王氏楊如桂妻翁疾藥必親嘗告天願以身代及
翁歿如桂廬墓氏竭力奉姑朝夕無間長子其
言貢舉季子其廉登第人謂孝感巡道張扁曰
篤孝天親詔建坊表其夫婦

李氏王世傑妻姑患瘋疾十年奉養不倦

宋氏陳閨妻祖姑老而失明氏奉養不倦數年不
離牀榻

王氏楊其言妻性最賢淑妾亡撫其二子如己出

邑共贊之

王氏生員任嵐妻善事舅姑守道旌獎

李氏王尚賢妻至孝守道旌獎

國朝

王氏李雲達之妻青年喪夫堅志苦節義方訓子
相岐相徵俱以國學成名孫八人名噪膠庠知縣
楊旌其門

郜氏生員李鏘妻乃少卿李公棟之曾孫婦也夫

涉縣志

卷之十

人物

十九

卒氏年十八歲撫兩月藐孤矢節不變竭力事

姑和丸教子振先入庠邑令屢旌其門

任氏李純柏妻年二十三喪夫姑老子幼家無田

產代人紡績度日茹苦萬狀及姑卒塋訖親族

勸其改節氏誓死不從撫三子成人苦節四十

年邑令左旌之

任氏楊芬芳妻年二十夫故無子守節年逾六十

邑令黃旌之

